

Repower scriva puspe cifras cotschnas

La Repower senta la restructuraziun en il sectur d'energia

■ (mc) Il squitsch dals pretschs sin il martgà internaziunal ed il curs da stgomi disfavraivel han influenzà marcantamain l'onn da gestiun 2015 dal concern d'energia grischun Repower. Quel serra cun ina sperdita da 136 milliuns. La prestaziun totala dal concern Repower e sa sminuida 2015 per 17 pertschient sin radund 1.9 milliardas francs. Sco l'interpresa communitescha saja ella sin buna via da realisar las strategias novas ed ins haja gia cuntanschi ils emprims success cun rinforzar la strategia da partenadi e cun s'engaschar en novs sectur da fatschenta. Buns resultats han Repower cuntanschi era l'onn passà cunzunt sin ils martgads regulars sco provediment da basa, rait e parcs da vent.

Reduci marcantamain la valita dals implonts

Risguardadas en il quint annual da 2015 èn ina reducziun da la valita dals implonts idraulics da 69 milliuns, ulteriuras adattaziuns da valita e pretensiuns da radund 12 milliuns sco era admissas a las reservas sin contracts da lunga vista da total 7 milliuns. Il retgav da l'entira gruppa ei s'augmentà sin 136 milliuns, entant che quel aveva muntà en l'emprim semester da 2015 a 115 milliuns. Ils effects da la valuta e dal nov sistem da valitaziun han chaschunà ina sperdita da 57 milliuns. Il cash flow da l'activitad operativa ha muntà a 17 milliuns, la quota d'agenchapital a radund 33 pertschient. Ils debits nets èn creschids levamain sin 270 milliuns.

En il rom d'ina adattaziun da strategia proveda Repower da realisar differents desinvestiziuns, tras las qualas ins quinta pudair realisar en il decurs dals ultims 5 mais tut en tut 60 fin 80 miliuns francs. Augmentà il cash flow ha cunzunt la faschenta en Rumenia e la reununzia da realisar igl implont per l'ovra da Teverola sco ovra da partenadi e da participaziun.



Conferenza da pressa da Repower: il schef operativ Kurt Bobst ed il schef da finanzas Stefan Kessler,

FOTO: Y. BÜRKL

«Quels resultats èn il maletg d'in ambient economic che resta vinavant difficil ed a las midadas incalculablas sin il sectur d'energia en l'entira Europa», ha il schef operativ da Repower Kurt Bobst puntuà: «Nus essan vinavant confirmads en nossa lavur da sviluppar cunscienziosamain vinavant la cumponenta da prestaziun da Repower.

Electricitad constanta e dapli gas

En tut ha l'interpresa vendì current electric per radund 17,7 uras terrawatt. Quest quantum saja restà constant en cumparegliaziun cun l'onn avant. La vendita da gas è creschida danovamain per 16 pertschient sin rodund 2.5 milliardas meters cubic. La vendita als clients finals ha pudì vegnir augmentada per 6 pertschient. L'atgna produczi-

un da forza idraulica è stada grazia a las favuraivlas relaziuns hidrologicas ed il bun stan dals implonts sur la media dals ultims 10 onns. Malgrad quai na saja ina rentabilitad betg garantida en vista a la situaziun actuala sin il martgà mundial, ha puntuà Bobst.

Nova strategia da Repower

Dapi intgins onns s'engascha Repower per effectuar che la fatschenta daventia pli independenta dals pretschs d'energia dal martgà e per simplifitgar ils process administrativs. La nova strategia da manaschi è la suandanta: sa pusiziunar successivamain sco producenta da plirs products, rinforzar la vendita, concentrar sin l'atgna producziun d'energia regenerabla, sa focalisar sin il martgà da Svizra ed Italia, eventualmain vender

las intepresas en Rumenia e l'implont da gas cumbinà Teverola sco era renunziar a la participaziun vid ovras atomaras e purificar la structura da chapital.

En il rom da la realisaziun da la strategia vegn era examinà la cooperaziun cun l'interpresa Richmuth Infrastruktur Schweiz SA che è engaschada en la renovaziun da l'Ovra idraulica pitschna da Morteratsch SA. Repower obtegn la responsabladad da procurar per la construcziun dal manaschi da questa ovra.

Novas activitads da fatschenta

Cun success lavura Repower vid incumbensas da mantegniment e planisaziun per autras interpresas d'energia purschend a quellas ses servetschs. Era il circol da clientella e da partenaris da fa-

tschenta saja vegni engrondì. Repower s'engascha dentant era sin il sectur da l'electromobilitad. Plinavant ha Repower sviluppà 2015 l'emprima glista Smart-Grid-Tarif da la Svizra. La finamira è da cussegljar la clientella co ch'i reusseschia meglier d'adattar la tenuta da consum per uschia contonscher meglier las finamiras da la vieuta d'energia ed uschea era equilibrar meglier l'adiever da la rait. Ils retgavs per tals servetschs duain vegnir augmentads fin 2020 sin passa 30 milliuns francs.

En il ultims onns è Repower en contact intensiv cun la cumissiun d'electricitad federala cun l'intent d'integrar sias ovras pitschnas el regim da la rait naziunala. Tras questas activitads reguladas ha Repower pudì recaltgar 2015 in retgav da radund 22 milliuns.

A moda favuraivla sa sviluppescha era il martgà en Italia. Als clients talians han Repower pudì vender 5 pertschient dapli electricitad e 6 pertschient dapli gas.

Propostas dal cussegl administrativ

Per mauns da la radunanza generala che ha lieu ils 12 da matg a Landquart propona il cussegl administrativ d'era renunziar quest onn a la conderschida d'ina dividenda. Il cussegl administrativ duai vegnir reduci da 12 sin otg commembers. Ad ina reelecziun renunzian: Myriam Meyer Stutz, Domenico De Luca, Roger Vetsch e Peter Molinari.

Tenor il schef operativ Kurt Bobst è Repower bain preparà per l'avegnir per dar damogn a las novas pretensiuns dil martgà ed als basegns midads da la clientella cun porscher soluziuns attrattivas. Quai grazia a collavuraturas e colavuratur motivads, in spiert d'interpresa innovativ e curtas proceduras da decisiun, sco Repower scriva.

La comunicaziun da pressa davart l'andament da l'interpresa grischuna è dal reminent cumparida en tudestg, talina, engles e rumen. Ina versiun rumantscha n'è betg a disposiziun!)